

DISPUTATIO MEDICA
INAUGURALIS

De

HÆMORRHOIDIBUS
NIMIUM CONNIVENTIBUS
ET COECIS,

QUAM,

ADSPIRANTE DIVINA GRATIA

JUSSU ET AUTHORITY

GRATIOSISSIMÆ

FACULTATIS MEDICÆ

IN

ALMA ASCLEPIADEÆ FAMILIÆ NUTRICE
ALTDORFFINA

PRO LICENTIA

Summos Honores, Privilegia & Insignia

DOCTORALIA legitimè & solenniter

impetrandi,

*Publicæ placidæq; Eruditorum Disquisitioni
submittit*

CAROLUS LUDOVICUS
FUNCCIUS, ULMENS.

Ad D. XXX. April. A. C. M. DC. LXXVII.


ALTDORFF,

Typis HEINRICI MEIERI, Univers. Typographi.

VIRIS
GENEROSIS, MAGNIFICIS, NOBILISSIMIS, MAXIME STRENUIS,
AMPLISSIMIS, PRUDENTISSIMIS,
DOMINIS
DUUMVIRIS,
CONSULIBUS,
CÆTERISQ; INCLYTÆ ET LIBERÆ
S. R. I. REIPUBLICÆ
ULMENSIS
SENATORIBUS
GRAVISSIMIS,
PATRIÆ PATRIBUS
VIGILANTISSIMIS,
DOMINIS SUI GRATIOSIS, ET PROMOTORIBUS MAXIMIS,

Disputationem hanc Inauguralem
ea, qua par est, animi submissione in
devotæ mentis indicium, ulteriorem-
que sui commendationem,

offert atque consecrat,
AUCTOR



A & Ω!

Non minus verè, quàm sapienter & piè dictum est, DEUM, supremum illud Majestatis Numen, ac maximum omnium rerum Authorem atq; Dominum; & Naturam, utpotè ordinariam, ordinatamq; à DEO, in cunctis rebus frustraneo nil machinari consilio, nec uspiam supervacuos impendere labores; sed omnia propter certum finem. Singulari namq; & ferè admirabili Naturæ solertia atq; sagacitate factum itentidem esse constat, ut ea toti corpori, loca ad superfluum humorum, vel etiam vitiosorum & heterogeneorum excretionem, concesserit convenientia; præsertim cum certum per seculorum omnium experientiam habeatur, Hominem, admirandum illud animal, sexcentis diris ac difficillimis subinde affligi ærumnis. Dedit itaq; Cerebro palatum, nares, oculos, aures, & parotides; & c. Cordi & pectori asperam arteriam, glandulas sub axillis; Renibus ureteres cum vesicâ & c; per quæ & alia loca Natura bene valens mediante flamma vitali plurimos, materiam scil. morbificam expellendo, expugnando, solvit morbos. Dedit insuper & visceribus vasa, ad extremum intestini Recti circuitum desinentia, Hemorrhoidalia dicta; è quibus superflui sæpius, haud raro

rarò etiam prodigiosi emanant humores, sanguineus guttatim vel etiam copiosius decurrit imber: quæ certè expurgatio, rectè si procedat, & à naturæ tramite longè non recedat, maximam in omnes humanæ vitæ partes latisimè sparsam habet utilitatem, cum assueti infinitas ferè effugiant ægritudines, præclarumq; ad Sanitatis tutelam consequantur commodum, contestante ac proclamante Experientia, quam magistræ rerum omnium Sapientes profitentur. Quoties a. evacuatio ista justo immoderatiores & nimis largæ sit, aut præternaturam ita supprimitur, ut exinde venæ hæmorrhoidales tumeant, doleant aut inflammentur, innumera in corpore procreantur molestiæ, acceditq; malorum fœtura, & morborum Ilias. Cui immoderationi hæmorrhoidali cum non tantum viri, sed etiam quandoq; fœminæ obnoxie sint, (utrisq; quamvis plurimæ si scil. s. n. fiat fluxus, exinde resultent utilitates,) placuit impræsentiarum hanc utriq; sexui communis affectus naturam cum therapia, loco Inauguralis Dissertationis, Decreto Amplissimi Ordinis Asclepiadei, brevissimis, quantum quidem temporis ratio, & ingenium & iudicium permiserint, Eruditorum oculis præprimis, qui Sacra Hygiæ studio litant, exponere. Huic ergo nostro conatui ut fauveat ter S. Numen supplex veneror, & felices subindè successus gratiosè concedat, quò in sui nominis gloriam, proximi salutem & nostrum commodum omnia vergant.



I. N. S. S. T.

THES. I.

ATq; ut ab ipsius vocis origine, receptæ metho-
do morem gerentes, Hæmorrhoidum auspicemur tra-
ctationem, Ἀρχὴ γὰρ τῆς παιδεύσεως ἢ τῶν ὀνομάτων ἱπ-
σκεψις; Nos, relictis tamen omnibus aliis Etymologiis, quibus in-
terdum Criticarum speculationum cupidi delectari solent, se-
quentes dabimus: αἱμορροῖς origine græca est vox composita, &
deducitur ὡς ἀπὸ τοῦ αἷμα, quod sanguinem notat, & ῥέω, quod fluo
significat, & ita sanguinis fluxum sive effluvium designat; hinc
αἱμορροέω, sanguinis fluxum patior, sive sanguinis profluvio labo-
ro. Et muliercula αἱμορροῖσα cap. 9. Matth. dicitur.

II. Licet autem αἱμορροῖς vox in communi significationis
æstimatione *generaliter* ad omnes sanguinis fluxus, vel è naribus,
vel ore, vel ex aliâ quâcunq; corporis parte referatur, quo mo-
do sumitur etiam *Philosopho*, dum 3. de part. Animal. s. p. 617. se-
quentia profert: Πᾶσι μάλιστα τὸ αἷμα καὶ τὰς ἐνρυχοροτάτας πόπας.
διόπερ καὶ ἐκ τῶν μυκτήρων, καὶ τῶν ὀφθαλμῶν, καὶ τῆς ἐδρας ἐνίοτε καὶ ἐκ τοῦ σώματος
αἱμορροῖδες γίνονται. *Strictior* tamen usu Medicis venit, id quod
diversè in eorum libris videre licet, ut denotet vel venas ipsas in
ano dilatatas aut eò deductas, quæ à symptomate nomen habent;
vel tumores, circa extrema istarum venarum p. n. obortos; vel
sanguinis ex oris illarum apertis profluvium; hæcce ultima signi-
ficatio est usitatissima, Hippocratiq; in Aphorism. unicè intentata.
Solet itaq; quandoq; Natura, servandæ humanæ vitæ nun-
quam tædiosa aut desidiofa, sed subindè laboriosa & studiosa,
beneficio fl. vital. sanguinem heterogeneum, vitiosum secernere,
& deponere in vasa ad podicem definentia, ex quibus, sive

hinc reſeratis oſculis erumpat ſanguis, ſive clauſis ſubſiſtat, hæ-
 morrhoidalia, i. e. ſanguiflua, fortean per excellentiam nomi-
 nantur, quod ſcilicet hæc vaſa ani præ cæteris, exceptis uteri, fre-
 quenter fundere ſanguinem ſoleant. Undè *Celfus lib. 6. c. 18.* idem
 affirmans, de venis ſedis dixit: *Ora venarum, tanquam ex capiti-*
bus quibuſdam ſurgentia, quæ ſæpè ſanguinem fundunt αἱμορροΐδες
Græci vocant. Obiter autem cum *Hieron. Fabric. ab Aquapendente*
lib. de operat. Chirurg. c. de Hamorrhoid. hîc monendum: *Celfum, ut*
& Galenum, libr. de theriac. ad Piſon. ora venarum potius, quàm ve-
 nas ipſas hæmorrhoides appellare, cùm ex oris ſanguis potiffi-
 mùm fluat, & quod ejusmodi ora ſanguinem ſæpè fundentia po-
 tiſſimum in ano & utero exiſtant, in hiſitaque partibus hæmor-
 rhoides eſſe cenſuerunt. *Propriffime* verò αἱμορροΐς eſt ſanguinis
 per arterias hæmorrhoidales ad podicem, in recti inteſtini extre-
 mum deſinentes, effuſio. Quatenus autem ſanguis clauſis ma-
 nentibus oſculis ſubſiſtit, venarumque extrema in tumorem at-
 tollit, id quod *in cæcis*, quæ ſic appellantur (*potius clauſis, vel do-*
lentibus, ut vult Platerus) accidit hæmorrhoidibus, *impropriè* tunc
 ſumitur, nam ſi nomen ſuum tueri debet ex vi ſignificationis &
 originis ſuæ, *propriè* & nil aliud ſignificare poteſt, quàm fluxum
 ſanguinis. *Impropriè* prætereà eadem vox αἱμορροΐς ſerpentis
 quoddam denotat genus, inde appellatum, uti habet *Ariſtoteles*
theatrum illud Naturæ admirabile, & Galenus ſacræ no-
 ſtræ Medicinæ Antifteſ. *ad Glaucon.* quod morſu ſanguinem, &
 quaſi profluvium ſanguinis excitet, ac diſſolutis venarum com-
 merciis, quicquid animæ eſt evocet per cruorem, teſte *Solino in*
polyhiſtor. c. 40. videatur etiam *Senn. lib. III. Med. Præſt.* Demum
Vareſcus de Taranta in Philon. Pharmaceutico & Chirurg. lib. II. cap. 56.
Excreſcentias intra nares p. n. hæmorrhoides appellat, propterea,
 quod ortum habeant ab humorum à capite deſtillationibus, du-
 plicesque conſtituens & albaſ molles, tractabiles, & duras ru-
 bras, dicit illas non multum differre à cancro vel polypo. Sed
 diverſis iſtis ſignificationibus relictis, nobis hoc loco de hæmor-
 rhoi-

rhoidibus apertis sive sanguinis ex apertione venarum, arteriarumve libero effluxu; & *cacis*, sive ejusdem in modò dictis vasis subsistentiâ, illaq; in tumorem attollente, sermonem esse, ex ipsa jam patet inscriptione.

III. *Synonymorum* non adeò frequens datur numerus. *Græcis* ut jam dictum αἰμορροΐς dicitur. *Latini* hujus affectus appellationem à *Græcis* mutuuntur. Vocatur etiam aliàs *hæmorrhoidalis fluxus*, *tumor*, aut *dolor*. Multi autem *Doctores* hæmorrhoides *cacas* cum *ficibus* & *mariscis* confundunt, quod tamen minimè faciendum. *Mariscæ* enim longè alius sunt affectus nempè tubercula carnosæ, oblonga, quasi verrucæ ad cutem tenuia, suprâ lata, subrubra, asperâ, florem thymi referentia, undè & thymi appellantur, & si magni sunt, ficus. Sed plura de his infrâ. *APERTE* sive *apparentes* nominantur, quæ certis quibusdam temporibus aperiuntur & sanguinem liberè & inoffenso cursu dimittunt, vel quibusdam etiam, quod in conspectum veniant. *COECÆ* verò sive *occæcatæ*, & *Græc.* τοφλαί, quæ tument cum dolore, nec sanguinem reddunt; non tamen ignorandum cæcas etiam dici interiores hæmorrhoides, quia non conspiciuntur. Superbo nomine nuncupantur *Germanis*, *die güldene Adern* / *der güldne Aderfluß* / forsitan ab aureo & insigni commo- modo, cùm sine impedimento fluentes à magnis & multis mor- bis vendicent. *Sanitatem enim totius corporis inde resultare neces- sum putant nonnulli in assuetis*; uti verba Senis nostri venerandi ha- bent. Nonnulli verò foeditatem, molestiam, incommodorum proventum considerantes potius existimant, dicendas *die bleierne Adern*; nam si intempestivè funditur sanguis, aut suppri- mitur & repentè sistitur, quam plurima inde proveniunt mala. Quod itaque aureas venas nominaverint, κατ' ἀντίφρασιν factum esse puta, quasi minimè aureas voluerint. Dicitur multis quo- que *die Ruff-Ader* / à bifurcatione fortean illâ insigni, in ultimis lumborum vertebra factâ, ex Venæ C. & Arteriæ M. inde ad anum productione. De his vid. *Aquapend. cit. loc.* Denique

Hæmorrhoides apertas, sive nimium sanguinis profluvium Germani nominant den Blutfluß unter sich/ der guldnen Ader Blutfluß. Cæcas verò Verstopffung oder Anlauffen der Gold-Ader. Ein heimliches Leiden. Ast plura, ad nominis notitiam facientia non addimus, siquidem hæc non tam curationis, (scimus enim nomenclaturâ neminem servari) quàm felicioris diagnoseos gratiâ, cum scilicet maximam legentibus afferat utilitatem vocum enucleatio, præmittenda erant.

IV. Satis in nominali definitione enodandâ occupati fuimus, necessarium nunc est, ut realem tandem pro re natâ in medium producamus; quare recto sine verborum parasangis procedimus tramite, atque rem ipsam penitus paulò lustramus, generali autem hæmorrhoidum definitione neglectâ, cum nobis de earum symptomatibus tantum sermo sit, sequentes Apertarum & cœcarum damus descriptiones: HÆMORRHOIDES p. n. APERTÆ *sunt sanguinis ex vasis ani nimis larga & p. n. evacuatio, cum virium periculo conjuncta, oborta ab ejusdem ad anum collectione, turgescentiâ, aut acrimoniâ continuitatem, vasorum dissolvente.* COECÆ verò describuntur; quod sint tumor vasorum ani, ortum trahens ex subsistentiâ sanguinis, liberè quidem affluentis, impeditè verò ob turbatum dictorum vasor ordinem refluentis, eorundemq; orificia in tumorem attollente, cum ingenti exquisitoq; dolore conjunctus.

V. Genus formalem rationem exprimens, sanguinis nimis larga copiosaque excretio in præter naturam Apertis constituit, manifestè declarans ad quam rerum Classẽ præter naturalium hæmorrhoides hoc loco pertineant, scilicet non ad morbos, neq; ad causas morbi; (quamvis in respectu ad alium morbum causæ procatarticæ locum obtineant;) sed meritò ad secundam symptomatum classẽ, scilicet *ad vitia retinendorum excretorum*, referendæ sunt: Dumque excretio hujusmodi cruoris valdè molesta sit, & magis sensibus obvia, ac plerisq; terrifica, ab ea tanquam à potiori facienda est denominatio, quamvis non negemus, præ-

præfens nostrum symptoma , (quemadmodum alia omnia ,)
 morbum vel *intemperiei* , vel *organicum* , vel *solutæ unitatis* præ-
 supponere: ex quibus essentialibus morbi differentiis ultima ceu
 magis sensibilis hîc venit accusanda , licet & priores duæ concur-
 rere possint. Hinc frequens naturæ limites excedit , adeoque
 præter naturam redditur , uti ostendit *Galenus 3. de causis sympt. c. 2.*
 dicens: *Omnes sanguinis eruptiones præternaturales esse , & quidem*
toto genere , modo excretionis , loco & tempore , sive ex vulnere externo ,
sive ex ventriculo , vomitu ; sive ex faucibus , sreatu ; sive ex renibus
miſtione procedant , exceptâ solâ menstruâ excretionem , quæ tamen &
ipsa præternaturalis fit solâ multitudine. Quidam tamen effluvium
 hoc , quod ὅλω τῷ γένει toto genere præternaturam sit , omitten-
 dum esse censent , cum sæpè ipsa Natura talem in sui commodum
 instituat evacuationem. Non negligenda propterea quæstio
 illa , quæ passim apud Authores agitur : *Hæmorrhoides sintne*
excretio naturalis , an verò præternaturalis ? Plurimi Authorum
 ob sequentes potissimum rationes , eas in numerum excre-
 torum secundum naturam locant. I. Quia id , quod finis bo-
 ni & secundæ valetudinis tuendæ gratia fiat , secundum na-
 turam fieri dicatur , ac propriè secundum naturam. Fieri
 autem fluxum hæmorrhoidum moderatum fine optimo , & ma-
 gno cum usu individui , tam firmum esse & *Hippocrati & Galeno* ,
 ut ferè numerari nequeant loca , in quibus utilitatem ejus sum-
 mam deprædicant. II. Ingerunt ex *Solenandro* , qui aliquoties
 hunc fluxum naturæ operâ , item naturæ beneficio contingere
 scribit , & naturæ cursum vocat. Imò licet , quod excernitur to-
 to genere præter naturam videatur , tamen elegans & absolutum
 Naturæ benè valentis , muniaque sua tunc rectè administrantis
 opus esse dicit. Ab horum tramite etiam non aberrare videtur
Ecc. Leichner. dissert. de hæmorrh. Finis , inquiens , *cujus gratiâ Natura*
nil unquam frustra parans , opus hoc machinatur , est oneris depositio , &
sanguinis expurgatio , sanitatis deniq; tutela , huicq; subnexa præser-
vatio , vel etiam liberatio à morbis. Hoc saccharo oblinitur remedium
 istud , alioquin nemini non amarum futurum. Satius equidem fo-

ret, si Natura principiis obstaret, omnemq; talis cacochymia proventum inhiberet; verum cum id sæpè in viribus non habeat, facit id quod potest, & malam radicem prius extirpare nititur, quàm in florem & fructum abeat. Sed nihil horum animum veritatis avidum fatiat. Quamvis autem & nos non negemus, certo scil. habito respectu ad hunc vel illum hominem, ejusmodi fluxum convenientem dici posse, quatenus scilicet causas morbificas, utpote gravium aliàs morborum authores avertit, & ita hominem præservat. At quis non videt, hoc ipsum ex accidenti tantùm secundum naturam esse, cum nec perpetuum sit; accedit & hoc, quod à naturâ coactâ, àque præter naturali copiâ collectâ sanguinis superflui fiat, ex quo ipso constat, absolutè loquendo, quemvis etiam hæmorrhoidum fluxum esse præter naturalem, & quidem ratione excretionis, quia non fit naturaliter; ratione loci enim alvus & vasa hæmorrhoidalia non sunt destinata ad sanguinis evacuationem; demum ratione temporis, quia fit intempestivè contra consuetudinem. Sed non est in hoc circo pugnam omnem ut concludam.

VI. *Sanguinis* esse excretionem res ipsa loquitur. Sumitur autem hic sanguis non pro certâ ac determinatâ illâ temperatissimâ Massæ sanguineæ parte, prout tribus in Scholâ Medicâ vulgò receptis, bili scilicet, pituitæ, & melancholiæ contra distinguitur; sed pro totâ illâ massâ, quæ tùm in vasistùm extra eadem heterogeneus deprehenditur, inq; circulum perpetuò moveretur. Non immeritò itaq; hîc quæritur, *an sanguis ille, qui hoc in affectu excernitur, vitiosus*, (quod quidem omnes volunt) *subinde peccet qualitate?* Nos hoc nec simpliciter verum nec falsum esse existimamus; pro diversitate namq; subjectorum nunc bonus nunc pravus existit: quòd verò ex colore pravo nonnulli judicium sumant, dum plerumq; ater vel melancholicus excernitur, incertissimum vel certè nullum est. Quoties enim in κακοχολίς sanguis ex venâ sectâ laudabilis apparet, quippe floridus, qui tamen reipsâ vitiosus? & contra specie abominabilis in corporibus maximè sanis. Id quod quàm plurimos longa & multiplex experientia docuit.

VII. In definitione *Apertarum* denique additur, virium adesse periculum, h. e. defectionem temperamenti vitalis animati in toto corpore, dependentem ab immodicâ & nimis largâ sanguinis ex vasis ani excretionem, quam necessariò subsequitur dissipatio subita, & absorptio portionum spirituosarum, sulphurearumque, uno verbo activarum sanguinis, ceu pabuli flammæ vitalis.

VIII. *Cæcarum* autem *genus* constituit tumor vasorum ani, siue intumescencia à sanguinis heterogenei subsistentiâ. Quid verò tumor sit, & ad quod morbi genus referri debeat, magnâ contentione hodièq; inter Chirurgiæ Præceptores disceptatur. Li- tem hanc disceptârunt discrepantes Authorum principum sententia. Nos tamen concisè multa ut pronunciemus, cum *Speçtatissimo Gratiissimo Facult. Med. p. t. DECANO, Viro Excellentiss. atq; Experientiss. DN. MAURITIO HOFFMANNO, Sereniss. Elect. & Marchion. Brandenburg. ut & Reipublic. Norimbergens. Archiatro felicissimo, DN. Præceptor. & studiorum meorum Promotore, debito cultu ac observantiâ etatem colendo, in tract. generali de tumor.* dicimus, tumorem morbum ut plurimum compositum esse, ab eo denominandum, à quo actionum læsio proficiscitur. Sic morbus dicitur, quia est cum actione læsâ; est morbus compositus, vel enim intemperiem ab humore præsentem ortum, aut alium morbum in situ aut unitate solutâ habet conjunctum; additur in- terea ut plurimum, cum etiam simplices dentur tumores, quibus alius morbus nullus adhæret. Ast hæmorrhoides morbum constituunt compositum ex intemperie cum materiâ & auctâ magnitudine; denominatio propterea ab istis, à quibus actiones læduntur, desumi debet. Quotiescunque itaque sanguis heteroge- neus per arterias ad ani extrema pergens, ob turbatum autem va- sorum ordinem per venas non refluens, subsistit, novis subinde accedentibus ejusdem succi portionibus, dicta vasa in præter na- turalem magnitudinem attollit, & sic tumor excitatur, cum ex- quisito sæpius dolore conjunctus, nam dum in exquisito sensu præditarum anipartium & subjacentium nervosarum poros

materia peccans sese insinuat, non potest non earum solvi continitas, ut ita dolor excitetur vehemens. Sed tumoris & doloris generationis modum pluribus infra ostendemus.

IX. *Subiectum provehens sive via*, per quas scilicet sanguis ad partes ani fertur, secundum veterum tenorem *venæ* constituendæ, has quippe sanguinem ex corde ad partes nutriendas vehere credebant. Nos potius cum *Aquapendent.* substituimus vasa. Cum autem vasa ista sanguinem fundentia non sint unius generis, maximè necessarium propterea videtur hæmorrhoidum constitutionem naturalem, ante omnia tum ex veterum, tum ex recentiorum placitis brevissimis proferre, ut exortus illarum atq; progressus, earundemq; tandem constitutio præternaturalis melius inclarescat; ne cæco quodam impetu in spectatissimum curationis theatrum prius irrumpamus, quàm hæmorrhoidum cognitionem medullitus fuerimus consecuti.

X. Notum autem cuilibet etiam Artistyroni, vasorum genus sanguinem vehentium duplex constitui. Natura namq; sanguini succo illi vitalitatis charactere imprægnato, ejusq; gratia cuivis corporis parti distribuendo, ad illius evectionem & revectionem, duo vasorum ordinavit genera, *arterias* nempe & *venas*, idq; hac æternâ lege, ut nullatenus unum alterius vendicare sibi possit officium, quam diu anima, flammæ vitalis Præsidis regimen, sartum tectumque habetur; Et sic sanguis nectar illud vitale ex oceano ad auriculas, ex auriculis ad ventriculos, ex ventriculis ad arteriarum canales, ex arteriarum canalibus ad reliquas distantes animæ provincias propellitur, tum ut ita omnibus partibus ex æquo sui præsentia prodesse valeat, tum ut sui ipsius consumptionem & flammæ vitalis continuationem facilem habeat. *Venarum trunci* duo sunt *Portæ* scil. & *Cavæ*. Illi originem suam debent hæmorrhoidales internæ dictæ; huic vero hæmorrhoidales externæ. Hæmorrhoidales internæ secundum coli finem sub recto intestino descendunt ad ani extremum usq; ubi etiam hæmorrhoidales externæ junguntur; quarum usus secundum Vete-

res est, ora intestini recti extrema, crasso sibiq; conveniente sanguine nutrire; in statu verò præternaturali illis abuti Naturam ajunt, partim ad sanguinem ex purgandum, ut si quid pravi aut immoderati sanguini insit, tam in vena Portæ quàm Cava extrà corpus eliminetur, atq; ita oris venarum ad apertis hæmorrhoides fiant. Et hanc excretionem addunt, non per aliam partem, quàm per anum naturam commodius efficere, utpote cùm illa ab ipsâ naturâ ceu sentina & cloaca excrementorum constituta sit, ut propterea non sit mirandum, si venarum extremis ad apertis & modicè fluentibus nonnulli inculpatâ fruantur sanitate, nonnulli â gravissimis morbis tùm liberentur tùm præferentur, ut dicit *Galenus*. Econtrà suppressis, aut nimium fluentibus inducant ægritudines. Atq; *has* scilicet *internas* è V. Portæ exortas, antiquis notas; *istas* verò à Cavâ ortum trahentes incognitas fuisse tradit *Senn. cit. loc.* & cum eo alii plurimi.

XI Hinc recentiores Medici non contenti dictis à Portâ prodeuntibus internis, per quas cacochymiam aliàs expurgari tradiderunt; cùm præsertim ab illis ex singulari Anatomie studio nonnulli etiam ramuli à V. C. descendentes, adq; podicem desinentes inventi fuerint, hosce itaq; tanquam pro externis addidere, per quas Plethoram evacuari dixêre. Eorum exortus videatur *apud Spigel. Tab. 58.* aliosq; in delineatione V. Cavæ. Oritur scilicet ab Iliacâ hypogastrica, quæ insignis est, nonnunquam gemina, pro plurimis hypogastrii partibus, ut vesicâ ejusq; collo, pene, & uteri inferiore sede ac collo; nec non intestini recti musculis, unde hæmorrhoides externæ. Sed omnia hæc ex antiquâ hypothese.

XII. Ast si Circulationis opus intuemur, quo novo recentissimorum Anatomicorum decreto venæ sanguinem non amplius evehunt è corde, sed revehunt ad illud tanquam fontem suum, arteriæ eapropter atq; in hoc fluxu magis accusandæ erunt. Arteriarum autem exortus atq; progressus in *Tab. 60. ap. cit. Spigel.* aliosq; A. M. depingentes observari potest, ex quarum

proinde cognitione veritas magis elucescet; Et quidem V. P. per ventrem comitatur arteria mesenterica; Venam Cavam verò per corpus comitatur Arteria Magna. Illa offert arterias hæmorrhoidales internas; hæc producit externas. Usum Arteriarum hæmorrhoidalium à mesentericâ exsurgentium, præter nutritionem partium, quibus feruntur, varium assignant Authores, ut scilicet iis vel arte vel à naturâ apertis humores melancholici ac serosi evacuentur; utq; sic lien, renes, totumq; mesenterium à cœnosis & vitiosis humoribus liberentur. Harum nempe exortum ab arteriis emulgentibus & ramo lienis oblato non multum distare perhibent, adeò ut ab utrisq; facile ruentes derivent humores, si verò non deponant, per venam ejus sociam (quæ freqq. anastomosibus cum illâ unitur,) mesenterium perreptantem, in portam iterum exonerent, sicq; ad fontem remittant, Plura de his qui desiderat, adeat hodiernos Anatomic. Cl. Th. Bartholin. Spigel. Vesling. t. 1. mor. Rolfinck. & alios.

XIII. His de hæmorrhoidum exortu atq; progressu secundum naturam præmissis, reliquum est, ut & de earum statu præternaturali quid in medium proferamus. In dicto hæmorrhoidum præternaturali statu *subjectum specialius* constituunt vasa ani, & quidem Arteriæ potius quam venæ, per quas sanguis è corde ad partes, & ad anum quoq; ex necessitate scil. motus periodici diffundi solet; suntq; hîc quidem Arteriæ à mesentericâ inferiori & iliacâ hypogastricâ ad anum usq; protensæ; tùm in apertis nimisq; fluentibus, quàm in cœcis atq; tumentibus accusandæ. *Generalius subjectum* constituunt viri & foeminæ. Atq; hæc de hæmorrhoidum in statu secundum & præternaturam subjecto, sequuntur causæ.

XIV. Cùm autem omnium rerum Naturalium certa quædam & determinata præexistat causâ, illeq; Medicus non solum prudens censendus sit, sed etiam felix, qui poterit rerum cognoscere causas. Et nos ipsarum causarum enodationem jam aggredimur, in expugnandis utpote morbis summè necessariam,

riam, quâ sine aliâs in caligine versamur, si scilicet iis neglectis, vel saltem postliminiò consideratis ultrò nos convertimus ad curationem. Illæ attamen cum persæpè profundis tenebrarum nebulis immersæ sint, ut ad eas eruendas non minori sed arduo certè labore opus esse videatur, nostrarum ita quoq; erit partium diligentiori *ζητήσθ* modò in *Apertarum*, demum in *Cæcarum Hæmorrhoidum* inquirere causas.

XV. *Causa* interea *morborum* cum variæ sint, quantum quædam externæ & remotæ, quædam internæ & propinquæ habentur, omnesq; necessariæ, ut rectè cognoscantur, cum morbus non nisi causis ablatis tollatur, primò itaq; *interna sive propinqua tum antecedens, tum proxima*, examinandæ erunt. Atq; *Apertarum hæmorrhoidum causa proxima immediata* nulla alia est, quàm *soluta unitas dictorum modò vasculorum*. Et quam à *Galeno*, aliisq; proxima statuatur *facultas expultrix ad expulsiōem irritata*, verùm quia in corpore illa nil agit, nisi à sanguine & ejus flammâ in actum deducatur; meritò itaq; illi nos apertionem vasculorum ani tanquam proximam substituimus causam, quæ triplici fieri solet modo; sive per *ἀνασφύσσιν*, id est simplicem extremorum orificiorum quorumcunq; vasorum apertionem, & relaxationem, quæ fit ob copiam humiditatis, citrà respectum ad qualitatem hanc vel illam peccantem, contentæ, relaxantem & aperientem. 2. per *διαίρεσιν*, per vasorum divisionem, quæ fit ab erodentibus per *ἀναβρωσιν* seu erosionem à materiâ quacunq; acrisalsâ, humoribus & ichoribus acris, vel distendentibus, quales sunt flatus; vel rumpentibus, verbi gratiâ clamores, motus vehementes, ponderum gravium gestationes, contusiones. 3. *διαπήδησιν* sive transudationem, quando sanguis è venis quasi transcolatus aut sudoris modo transmissus effluit. Fit id vasis rarefactis, sanguine ichoroso existente, vel ore gracilium vasorum aperto, ubi sanguis non cum vehementia & copiâ profluit; quod rarius aut nunquam uti refert *Solenand. in consil.* accidit.

XVI. Aper-

XVI. Apertionis autem hujus causa est *sanguis*, id quod ex datâ definitione liquere potest. Duplici verò modo peccante potissimum fit *causa sanguis nimii profluvii*, nimirum vel per *plethoram*, vel per *cacochymiam*; quas duas etiam causas apertionis vasorum agnovit *Galenus l. 4. meth. med. c. 2.* *Plethora* hîc intelligenda est peccans, & quidem præcipuè quoad *vasa*, quando sanguis intantum augetur, ut in vasis amplius contineri non possit, sed turgescentes eorum orificia vi quadam aperiat, & continuitatem rumpat, sive illa exquisita in sanguine puriore abundante consistens fuerit, sive spuria, massam sanguineam ad *cacochymiam* jam vergentem incluserit. *Cacochymiam* quod attinet, quamvis variæ dentur species, quemadmodum ex *Dogmatibus Medicis Viri Nobilissimi, Excellentissimi atq; Experientissimi DN. D. BRUNONIS*, liquet, *Patroni ac Præceptoris mei ætatem colendi.* In hoc tamen affectu *cacochymiam* biliosam, serosam, & melancholicam, (cùm omninò ij magis sint hæmorrhoidibus obnoxii, qui sanguinem adustum habent, & qui in juventute fuere sanguinei, quibusq; in adultâ ætate sanguis aduritur, quiq; demum affectioni hypochondriacæ sunt obnoxii;) accusandam esse, nemo erit, qui in dubium vocet, præsertim cùm tantus hâc in re Medicorum sit consensus, tantaq; concordia, ut cum *Plauto* dicere posses, omnes rem compacto egisse, velut in velabro olearii. Confirmat etiam hoc *Galenus*, quando *l. 3. de Caus. Symptom. c. 2.* dicit: *Imprimis acrimonia sanguinis serosa & ichorosa potens est ad reseranda & erodenda vasculorum orificia.* *Acrimonia* autem illa originem trahit à particulis salinis adustis; sive ichorescit sanguis, dum calor ejus vitalis igneus redditur, inflammabiles pabuli sui, sive spirituosas portiones veluti per conflagrationis incendium celeriter absumit, unde factâ colliquatione portionibus ejus salinis in fluorem evectis, falsa & adusta in reliquâ humiditate, lixivio salino similis relinquitur constitutio.

XVII. Ad utrumq; autem concurrit sanguinis motus peccans, hoc est ebullitio, effervescencia ejus & fermentatio præternatu-

naturaliter aucta, dum scil. collectæ copiosiores inflammabiles & sulphureæ portiones vehementius in passivas agunt, eas movendo, agitando, subigendo, hisque acrimoniam, ichorositatem, fuliginositatem per nimium illum motum & fervorem conciliant, vel dum impurior massa accedente per causas externas fermento quodam extraneo & vitioso, aut alio impetu agitante, ad turgescientiam aut ebullitionem incitatur, sicuti, partim ex antea laudat. *Speçtatiss.* DECANI, DN. D. HOFFMANNI, in *Prud. Medic. Dissp.* partim ex *Willis.* constat. Imprimis verò sudatio impedita, quâ fuliginibus igneis à Massæ sanguineæ subinde exhalantibus per cutis spiracula, ob pororum scil. constipationem, excernendi occluditur via, hûc facit; ideò quod sanguis earum mole adauctus protinus turgescat, fervoremque concipiat. Atque hæc de proximâ Apertarum causâ.

XVIII. Cùm autem unius rei plurimæ esse possint causæ, idque non secus in Medicinâ quàm Philosophiâ verum sit axioma, necessum quoque erit reliquas mediatasque rimari causas. Prodeant igitur in scenam naturales: Inter quas occurrit I. *Temperamentum*, quod quàm varium sit vulgò nòtissimum; in nulum tamen magis cadere potest, quàm plerumque *biliosum, serosum, & melancholicum*, quod aliàs frigidum & siccum appellari solet. II. *Ætas*, proclivior adulta, virilis, consistens, etenim hæmorrhogiarum familiaris juvenibus & adolescentibus, hæmorrhoides verò consistentibus, & senibus. Unde *Hipp. sect. III. aph. 30.* *Quæ juventutem excipit provectior ætas ab anno XXXV. ad LX. præter propter,* (nequit enim numerus annorum exactè definiri;) *sanguinis melancholici copiâ tentari solet*, quâ ratione huic decurrenti ætati familiarem hunc fluxum esse voluit. Idem: *Nulla ætas morbis vacat, & in ætate quæ παρὰ κρισεως, magis hæmorrhoides fluunt, quàm in quavis aliâ vitæ parte. Et libr. de Aëre, aq. & loc.* *Τοῖσι ὃ ἀνδράσι, θυσιν περὶ αἵας, καὶ ἀγρῶν αἵας καὶ ἡπάλεις, καὶ πυρετὸς πολυχρονίης χειμερινὸς, καὶ ἐπινυκλήδας πολλὰς, καὶ αἱμορροϊδας ἐν τῇ ἔδρῃ.* III. *Ætati succedit sexus*, Maribus itaque in virili

rili ætate constitutis accedit hic fluxus plerumque ordinariò ;
 Imò non desunt Viri , inquit *Marcus Donatus 4. histor. Medic. mir.*
19. pag. 411. quibus instar menſtruorum ab hæmorrhoidibus ſanguis
ſtatis temporibus fluere conſuevit , quo fluxu ſuppreſſo in varia mala
delabi conſuevère. Interdum tamen & foeminæ ſubjacent huic
 fluxui ; curandamq; habuit anno 1662. *ſpectatiſſ. DN. DECA-*
NUS, nobilem matronam circa novilunium menſium, circa pleni-
 lunium hæmorrhoidum nimium fluxum ſentientem. Quoties
 autem in foeminis, aliàs ſatis ſanguifluis apparet, rarum id eſt, &
 contingere ſolet nonnunquam ob ſuppreſſa menſtrua, quorum
 tum vicem ſubeunt hæmorrhoides, unde & menſibus conferun-
 tur à *Galeno*, docente utilitates, quæ ex ſecretione menſtruorum
 & hæmorrhoidum proveniant. *Vena itaq; externa magnam quia*
cognitionem habent cum venis uteri & pudendi in mulieribus, hinc
eſt quod hæmorrhoides interdum officium menſium ſumunt ; Unde
Hollerius : De exterioribus inquit, non eſt dubium, quin ſint ſobo-
 les *V. Cavæ* ab explantatione poſt venas emulgentes, & distribu-
 tur in renes, veſicam, ſedem, pudendum, uterum, propter quem conſen-
 ſum ſuppreſſis menſibus, ut in mulieribus viduis videmus, ſapè men-
 ſium loco fluere hæmorrhoides. Idem *L. de morb. 55. ſchol. p. 462.* in
 gravidis quoque obſervavit hæmorrhoides utiliter fluxiſſe, dans
 hiftoriam duarum mulierum nobiliſſimarum, in quibus nihilo-
 minus partus tempeſtivus ſequutus fuerat, & foetus ſaluberrimè
 adoleverat. IV. *Regionibus Meridionalibus* magis feruntur fre-
 quentes, quàm *Septentrionalibus*, forſan quod illarum incolæ
 ſanguinem calidiorem & magis aduſtum, harum frigidiorem ha-
 beant. Et alii frequentiores eſſe dicunt *Hispanis & Italis*, *Vene-*
tiis maximè & *Patavii* degentibus, authore *Roderic. à Fonſec. Tom. I.*
conſ. 27. qui cauſam in frequentem nimis Aloës uſum rejicit. In
Germaniâ noſtrâ hoc malum quoque non infrequens. *Heredi-*
tarium idem nonnunquam eſſe, ſic ut totis familiis commune
 ſit, *Hiſtoriæ* teſtantur. *Judæi* denique quidam cenſent hæmor-
 rhoidibus cœcis iisque verrucalibus percuſſos fuiſſe *Philiftæos* à
 DEO,

DEO, cùm arcam foederis abreptam secum retinerent. Sed dimittimus cœcos Judæos, cum cœcis hæmorrhoidibus.

XIX. Post Res Naturales, offerunt se res non naturales Medicis ita dictæ; Eas inter fax & tuba *Aër*, qui, quâ ambiens, quâ inspiratus, quod si scil. jam fuerit magis vel minus intemperatus, vel alienis inquinamentis corruptus, vel inconvenienter insufficienterque agitato, ventilatusque noxam sanguini & corpori communicat. Sic namque immoderatè *calidus* massam sanguineam calefacere, liquare, dissolvere, attenuare valet, teste *Gualter. Charleton. Exerc. 5. Patholog. §. 4.* si autem justò humidior, seu etiam siccior fuerit, nullum est dubium, quin etiam hæmorrhoidum immoderatum promoverè possit fluxum. Hinc *Hipp. 3. aph. 20.* in genere sanguinis fluxiones vernò tempore frequentius contingere docuit, haud dubiè ob aëris calidam & humidam dispositionem; ita & *frigidiorè* per accidens constipando poros cutis, & fuliginum exhalationem, incendium postmodum sanguinis excitantium, præpediendo, sanguinis fusionem conciliare posse, extra dubitationis aleam res posita esse videtur, modò hoc observetur, præsupponere quoque alias causas concurrentes, & præcipuè intrinsecam sanguinis & partium ad excretionem facilem dispositionem.

XX. Non minori sed parievidentiâ præposterus *esculentorum & poulentorum usus* nimiam sanguinis hæmorrhoidalis excretionem promoverè potest; præsertim quotiescunq; cibus & potus simul excedant qualitate nimis calidâ, uno verbo medicamentosâ aromaticâ, quæque fermentationem sanguinis præternaturalem inducere satagunt. Imprimis vero *vini spirituosioris potus largior*, qui aliàs hæmorrhagias sanguinis copiam miris modis augendo, eumq; vehementer commovendo, excitare poris est, teste *Petro Forest. l. 13. obs. 12.* ita & in specie nimias hæmorrhoides ciere posse, indubitata veritatis est, quatenus ob multas spirituosas, inflammabiles ac promptè effervescentes portiones, quibus aliàs vina generosa abundant, sanguini communicatas, ejus turgescientiam & ebullitionem p. n. excitant.

XXI. *De somno & vigiliis immoderatis*, quòd ad hujus affectus generationem conspirent, non indiget multà probatione, nam utraq; modum excedentia nocent, partim humores dissipandos detinendo, partim detinendos dissipando. *Hipp. 2. aph. 3. & 7. aph. 71.* Huc pertinet etiam *exercitium corporis immoderatum*, quod fundit humores, & per hanc *Δαίχυσις* seu diffusionem corporis vitiosis humoribus totum replet. Qui humores erant ἐν σάσσι & συμνήξει, quiete stabant, *Δαχέονται*, funduntur, & raptu quodam huc illucve feruntur; rectissimè scripsit *D. Rolfinck. ord. ac meth. med. special. l. 2. f. 3. c. 53.*

XXII. *Excreta quoq; p. n. retenta* symbolam suam huc conferre posse nullum est dubium, cùm nulla non rejectaneorum redundantia naturæ molesta, atque gravis morborum fiat materia. Agmen tandem claudunt *Affectus animi vehementiores*, præsertim ira, amor nimius, sicut sanguinem fundendo, attenuando, agitando, atque ad nimiam ebullitionem & effervescentiam cogendo, aliarum hæmorrhagiarum causæ esse possunt, quod exemplis pluribus innotuit. Ita nihil obstat, quò minùs etiam in viris & foeminis naturà præsertim biliosioribus nimium hæmorrhoidum profluvium excitare valeant.

XXIII. Reliquas causas contingentes n. n. & p. n. seorsim exponere non concedit temporis angustia, neque etiam operæ pretium. Eas inter frequentiores possunt esse nimia sternutatio, equitatio, percussio, casus, vulnus, ulcus intestini recti; mensium suppressio vel imminutio tenesmus, suppositoria. Hæc autem omnia in eo ad institutum nostrum collimare videntur, quòd vel manifestam & violentam inferant continui solutionem in vasis hæmorrhoidalibus, vel sanguinem liquando, agitando, & commovendo, ad illam surbeundam vasa disponant. Et hæc de Apertarum hæmorrhoidum causis sufficiant.

XXIV. Reliquum nunc est, ut & *cæcarum* adjungamus causas, quæ præter eas quas cum apertis communes habent, plerumque sunt contrariæ. Et quamvis à *Philosophis* quatuor causa-

rum

rum genera rectissimè constituentur, nos tamen hîc potissimam rationem habemus causæ efficientis ad quam tumor sequitur. *Proximam hîc* ita constituit sanguis & quidem crassioris viscidioris liberè affluentis, impeditè verò ob turbatum pororum vasculorum an ordinè, refluxus subsistentia, dicta vasa in p.n. magnitudinem attollens, calorisque cum sanguine influxum partim excludens, partim transitum difficillimum reddens, non aliam ob causam quàm quod ductum sanguinis & caloris sequi nequeant, aut nolint. Impeditur verò refluxus varias ob causas, tam internas quàm externas, calorem & dolorem excitantes: Et ut calor, quatenus rarefactis carniū poris, humoribus liquatis, motus eorum ex arteriis in venas turbat, ac transitum difficilem reddit: Ita etiam dolor, quæ symptoma est, & solutam unitatem causam habet, humorum in exilibus partium vasis & meatibus, motus turbare & retardare valet. Quæ mala cum manifesta sint, indesinenterq; affligant, nec ablatis causis externis unà removeantur sed perdurent, pro veris causis quadantenus admittuntur, quoniam, interdum urgent, proptereaq; causarum naturam inducunt aliàs symptomata sunt, impeditum refluxum sequentia. Remotæ esse possunt frigus ambiens, sessio super lapide gelido, ciborum vel medicamentorum refrigerantium incrassantium vel adstringentium usus, difficilis item partus. Obstructiones in super viscerum, affectio hypochondriaca, nec non intempestiva excedentium hæmorrhoidum per adstringendo condensantia curatio.

XXV. Doloris (ceu eminentis symptomatis) causa est continui solutio. Unitatem solutam inferunt humores acres & adusti, ichorescentes, qui cum exitum non inveniunt, subsistunt, subsistentes, magis magisque ichorescunt, acriores subinde redditi, partes membranosas, circumjacentes atq; nervosas distendunt, vellicant & lancinant, idq; magis vel minus pro vellitionis vehementia aut remissione; dolor itaq; peracutus non tam ob venam ipsam affectam, quæ sensu quadantenus obscuro prædita est, teste *Aristot. & Galen.* quàm ob partes membrano-

fas & nervosas exquisito sensu præditas, quibus intexta est. Flatus quoque à sanguine crasso excitatos, distendendo scilicet dolorem interdum ciere aſſerit, *Joh. Crato consil. 206. f. 599.*

XXVI. Porro ex Causarum illarum varietate resultant *differentiæ hæmorrhoidum* variæ, quas paucis tantum attingam. Harum *prima & potissima* est à genere sive à *formâ specificâ*, dum peccant hæmorrhoides vel excessu vel defectu, illæ Apertæ, hæ verò cœcæ dicuntur. *Apertæ* iterum variant ratione magni vel parvi hiatus, & multi vel pauci sanguinis. *Cæcæ*, quoad *magnitudinem* sunt parvæ, magnæ vel mediæ; quoad *figuram* uvales, morales, verrucæ, vel vesicales; quarum omnium proventus esse potest à portionibus lymphæ & sanguinis adustis, serosis, ichoreſcentibus, & interdum tartareis subsistentibus, fibrosarum & membranarum circa intestinum, Rectum, occurrentium partium continuitatem vellicantibus, & variè dissolventibus; ratione *loci* sunt vel in ano vel inestino recto, vel musculo sphinctere; ratione *temporis*, est ista per ani venas expurgatio communiter periodica, menstrua, bimestris, trimestris, annua, pro diversa subjectorum dispositione, ita ut sine lege periodus satis inordinate interdum redeat, modo citius modò tardius, pro ratione causarum internas variè afficientium; sunt item recentes vel diurnæ, quò spectat *6. aphor. 12. Hipp. II.* à *subjecto* seu loco cui inhaerent, sunt vel internæ, vel externæ. *Internæ* ab Aortæ magnæ trunci Venam portæ comitantis ramo mesenterico inferiori, sæpè juxta lienem, sæpè ante lienem: *Externæ* verò ab ejusdem Aortæ M. rami venam cavam comitantis Iliaco ramo, ejusdemq; propagine hypogastricâ nascuntur; quæ cuncta juxta longitudinem coli descendunt ad intestinum rectum. III. à *causis* etiam proveniunt tam *internis*, quàm *externis*, sanguine peccante quantitate vel qualitate; sunt hæreditariæ vel adscititiæ; consuetæ ac inconſuetæ. Ratione *effectus* sunt salubres (criticæ) vel symptomaticæ: Illæ sunt bonitate naturæ, mediante flammâ vitali expellentis sibi noxia, ipsi propterea relinquendæ: Hæ autem non tam

tam naturæ, quam morbi, vel potius causæ morbificæ ratione, nobis utramq; paginam faciunt. Quoad tandem Symptomata, aliæ sunt cum inflammatione, exulceratione, feбри, ani procidentia, fistulis, gangrænâ. &c. Harum & aliarum differentiarum cognitio, licet ad curationem quodammodo requiratur, nos tamen impræsentiarum omnibus aliis neglectis, ad primam potissimam respicientes intentionem, puâ in Apertas ac Cæcas usitatissimè distinguuntur, illarum dignotionem & Curationem in subseqq. Thes. proponemus.

XXVII. Quamvis autem affectus hicce *signis diagnosticis* non videatur indigere, cum in sensus incurrat, & ita per se faciliè cognoscatur; nihilominus cum non omnis statim hæmorrhoidum fluxus sit p. n. omninò itaq; signis quibusdam opus est, quibus dignoscatur fluxum istum verè esse p. n. Hoc ostendit virium prostratio, crurum languor, corporis calor cachecticus & ad pallidum & viriditatem inclinans, qui teste *Avicennâ* talibus ægris proprius est; adeò ut hoc fretus signo, plures ex hæmorrhoidibus laborare, cum magno artis honore, se pronunciasse gloriatur *Forestus l. 23. obs. 4.* & alii affectus graviores, qui caloris nativi exolutionem sequuntur. Et licet sanguis ille, qui in vasis hæmorrhoidalibus est, in se quandoq; non sit vitiosus, sed idem cum reliquâ in toto corpore existente Mafsâ, solum quantitate in vasis sæpius dictis adauctâ, exitum suum urgeat; faciliè tamen patet, si ultra modum fiat excretio, quod necessariò lapsus virium subsequatur, detracto scil. vitali nectare, & flammæ vitalis sufficiente pabulo. Porrò licet tandem sanguis excretus etiam corruptus, heterogeneus fuerit, & ita desideret foràs excludi, nihilominus nimio ejus profluvio vires prosternuntur, & quidem usq; adeò sæpè ut simul anima deficiat, cum etiam cum excrementitiis portionibus, multæ portiones spirituosæ, laudabiles, ac proinde fomes fl. vitalis unâ exhauriantur. Hinc eleganter ab *Hipp. 2. aph. 51.* dictum: *Plurimum atq; repentè evacuare periculosum*; omne siquidem nimium Naturæ inimicum. Quænam verò sint signa causa-

causarum peculiaria, v. g. *Anastomoseos* & rupturæ, sanguis veluti confertim affluens, & causarum externè contingentium vehementia; *Diapedeseos*, sanguis dilutus & serosus rarior corporis habitus, ac temperamentum biliosum melancholicum; *Diabroseeos*, sanguis paulatim exstillans cum falsedine & acrimonia excedente &c. quoniam causarum illarum suprâ jam aliquam distinctam considerationem dedimus, non est ut crambem hic repetamus. *Subjecti* ratione, ex internis an externis, venis an arteriis sanguis fluat, signa distinctiva dari negant illi, qui discrimen internarum & externarum; omnemq; ex arteriis sanguinem duci asserunt.

XXVIII. *Cæcarum* signa cum tumore & tuberculis in oris venarum sunt dolor vehementissimus, qui gravior redditur, quando feces excernuntur, quandoq; mitior pro ratione distensionis venarum, cujus vehementiæ ratio à partibus admodum sensibilibus circa anum, nervosasq; sphincteris substantias, nervisq; ab osse sacro diductis, petitur; & interdum simul adest ani inflammatio, urinae sunt crassæ, turbidæ quandoq; cruentæ, vel stranguria accedit periculosa, ex *Avicennâ*.

XXIX. Non absre erit, si etiam signa distinctiva adjiciamus, ut quantum fluxus aut tumor hæmorrhoidum à similibus differat affectibus dignosci possit, quod quàm necessarium sit, docet *Alexand. Massariæ lib. 3. pract. Med. c. 24*. Ne decipiamur inquit, cum vulgaribus qui apparente aliquo tumore vel fluxu aliquo sanguinis circa sedem statim sine morâ hæmorrhoides esse ajunt. Dum tales affectus inter se & naturâ & curatione differant. Fluxus itaq; Hæmorrhoidum 1. ab *hepatico* differt, quod in hoc liquor carni-um loturæ similis excernatur; quod uno vel altero die reprimatur & post iterum redeat; ille vero minimè ut volunt aliqui. 2. à *dysenterico*, quia nec mixtus est cum fecibus, neq; cum dolore actorminibus ejicitur. 3. à *menstruo fluxu* in foeminis, uti tempore ita plerumq; loco. 4. Ab *uteri hæmorrhoidibus* loco saltem differunt, cum aliàs hi duo affectus maximè inter se conveniant.

XXX. *Tumor* itentidem *Cæcarum* à similibus distinguendus. Distinguendæ autem 1. sunt à *mariscis*. 2. à *thymis*. 3. à *ficubus*. Harum omnium distinctio ex suprâ allatis desumi debet. 4. à *condylomatibus*, quia hæc sunt oblonga tubercula, & venas non attingunt: *hæmorrhoids* verò major est, nigra & rotunda, venam aliquam occupans: nihilominus cœcæ hæmorrhoides aliquando ad condylomata accedunt, exemplum habet *Forestus c. l. obs. 7.* 5. à *Rhagadibus*, quòd hæc sunt ulcera quædam in fissuras diducta, iis persimilia, quæ in manibus aut labiis à vehemente frigore excitantur. *Massar. l. c. f. 229.* 6. à *cristis* seu excrescentiis ani, quæ ex nefandâ venere oriuntur, & pullulor. gallinaceor. cristas referunt. 7. deniq; *dolor hæmorrhoidum* à *tenesmo* distingui meretur, quia in iis exitus fecum non fieri traditur cum expressione adeò vehementi; tantoq; conatu, sicuti in tenesmo fieri assolet. *Gangrænosas* aspectu partium quamvis foedarum dignoscere jubet *Aquapend.* sæpius laud. cit. loc. sequuntur jam Prognostica.

XXXI. *Galen. lib. de constit. Artis, c. 12.* dicit. 1. *Curatrici arti Medicinæ nulla magis est propinqua; quàm prognosis*; hæc namq; irradiatus luce Apollineus mysta certior fieri potest, an remedia applicare operæ præteritum, an incurabilis æger prognosi relinquendus, ne præsidia infamentur, & Medicus ægrum occidisse videatur. Quod itaq; ad prognostica spectat, in genere certum est, omnem hæmorrhagiam aut diuturniorem aut profusiolem esse periculofam, & aliquando lethalem, quia Naturæ thesaurus & ille liquor nectareus, quo hominis vita sustentatur, dissipatur, & disperditur. Hinc & nimis largus & immodicus hæmorrhoidum fluxus periculo mortis minimè caret. Aliam tamen aliâ esse periculosiorem nullum est dubium; augetur enim aut minuitur difficultas & periculum pro magnitudine ac diuturnitate symptomatum, pro habitu corporis, temperamento, ætate, & similibus *Alex. Massar. cit. loc.* Hæmorrhoides propterea sunt quandoque salutares, si scilicet moderatè & convenienti tempore fluant, dum scilicet hominem à multis morbis præservant, & à præsen-

D

tibus

tibus liberant , ut docet *Hipp. 6. aph. 11. Melancholicis & nephriticis hæmorrhoides supervenientes bonæ sunt.* Non aliam ob causam ex veterum opinione, quàm quia à ramo V. P. splenico haud raro propago deorsum usq; ad intestinum rectum pergit, hinc dum scaturiginem in liene statuerunt , per evacuationem istam lienem sanatum fuisse , crediderunt. Et adhuc hodiè communis plerorumq; Medicorum est sententia , melancholiam quandoq; à liene malè affecto aut primariò excitari , aut plurimùm foveri, proindeq; peculiari vocabulo melancholiam hypochondriacam appellarunt. Recentioribustamen videtur, quòd culpa non tam in lienem, quàm potius in sanguinem ipsum reijcienda sit, quippe sanguis prior in culpâ, fœculentias atrabiliaras ab initio in se gignens, demum in liene deponit, quas postmodum in mali fermenti naturam exaltatas iterum excipiens, ab earum inquinamento in crasi suâ magis vitiatur. Quotiescunq; autem his evacuationibustempestivè factis, portiones sanguinis adustæ, acres, lixiviosæ eliminantur, & in illarum detractarum locum novæ spirituosiores, laudabiles & mitiores repullulant, dyscrasia sanguinis emendatur, hinc fit morbi solutio. In nephriticis autem scil. obstructis renibus propterea salutare censendæ quia hæmorrhoides externæ cum truncis V. C. & Arteriæ M. ad dorsum descendentibus conjunguntur, unde nephriticus evacuato imminutoq; sanguine in utroq; trunco & Venâ C. & Arteriâ M. obvio liberatus à laboribus istis, tùm etiam renes ab obstructione vindicantur. Porro id. in eâdem *sect. aph. 21. Infans si varices & hæmorrhoides supervenerint, morbi fit solutio.* Delirium ex crasso & adusto sanguine oriri posse, non ignotum, & sic delirantibus hæmorrhoides & varices bonæ sunt, si supervenerint, per has enim totum corpus à sanguinis feculenti malitiâ purgatur, & materia maligna abducitur à partibus principibus, & sic spirituum efferationes animæque elatio optimè supprimuntur. Si verò eadem materia exitu occluso retrò petat Cerebrum, ex palindromiâ fieri itidem mania possunt. Et *6. Epidem. comm. 3. l. 37. Sanguifluis venis labo-*

laborantes neq; morbo laterali, neq; pulmonario, neq; phagadenâ, neq; inflammatiunculis, quæ dothienes vocantur, neq; iis, quæ termenthi, neq; fortasse etiam leprâ, neq; aliis morbis corripuntur. Quoties scilicunque portiones sanguinis heterogeneæ, serosæ, acres, salsæ quasi adustæ, malignæ, putridæ, aliàs in variis locis, ob vasorum & partium turbatum ordinem impeditum refluxum stagnantes partiumque inflammationes, erosiones, dolores inducentes per hæmorrhoidum fluxum evacuantur, & extra corpus eliminantur. Observatum quoque est gravidis quibusdam, 4. menses in utero habentibus, hæmorrhoides utiliter fluxisse, iisque subsistentibus pejushabuisse. Imò *Aquapendens* absolutè concludere haud dubitavit, *hæmorrhoides in omnibus ferè morbis*, tùm præcavendis, tùm curandis prærogativam obtinere, primumque habere locum: hancque insuper evacuationem esse magis quàm per venam sectam affectandam, auspicandam. Dubium autem est *an in non asfuetis istiusmodi evacuatio tentanda?* Nos affirmativam defendere non dubitamus; præsertim cùm & in Italiâ in omnibus ferè hæmorrhoidum evacuatio tentetur; ratio autem esse potest, quia & sanguis V. P. & V. C. evacuatur, hæmorrhoides propterea frequentes aperiendæ, tàm in morbis V. Portæ, & in morbis V. Cavæ, vendicant insuper ægros ab obstructione lienis.

XXXII. Habent econtra hoc in commodi hæmorrhoides, si supprimantur, vel immodicè fluant, quod ægrum in hydropem, phthisin & alios morbos præcipitent; de quo *Galenus 3. de nat. facult. c. 8. Ex hæmorrhoidibus diuturnis suppressis, vel immodicè profluentibus ad extremam frigiditatem devenientes ægri sæpè aquam intercutem incidunt.* Generatur autem hydrops ex suppressis hæmorrhoidibus, vitioso & feculento sanguine hâc viâ interclusâ ad epar ruente, ejusq; calorem nativum suffocante; phthisis verò humore adusto falso & acri ad pulmones converso, ejusque vasa erodente, undè sputum sanguinis, & tandem phthisis; postquam enim sanguis plurimum depravatus, recrementa sua copiosius demùm aggesta aut pulmonibus aut in ventris visceribus suffundit,

dit, proindeq; hujus aut illius generis affectus sæpius exitiales accersit. Valde autem hîc se torquent Authores, quæ nimirum subsit causa, quod *sive fluxerint, sive non fluxerint hæmorrhoides, eadem in utroq; casu oriantur symptomata?* v. g. tabes, epilepsia, (nam per acriorem chylum & sanguinem ad regium cerebri domicilium ex hypochondriis confluentem sæpius etiam Epilepsia inducitur;) & hydrops. *Causa* reiicienda hîc in paupertatem flammæ vitalis; multiplicatio namq; & multitudo aquæ & ichoris, si scil. non fluunt, obruunt fl. vitalem. Si nimium fluunt, fl. vitalis deficit, corrumpitur chylicatio & sanguificatio, nam cum sanguine heterogeneo multæ etiam abscedunt portiones laudabiles, hinc reliquæ sui juris liberæ factæ, scil. vitiosæ, ductum fl. vitalis sequi nolentes, vel ad caput redundant; vel ad pulmones unde tabes; vel ad glandulas mesentericas, unde hydrops. Hæc ita & alia hæmorrhoidum suppressionem subsequuntur symptomata. Undè *Galenus 4. aphorism. 25.* scribit: *Evacuationi per hæmorrhoides non esse naturam assuefaciendam, quoniam periculosus est excessus, si supra modum sanguis excernatur, seu ex toto supprimatur.* Et *Aëtius* inquit: *Hæc affectio plurimorum malorum hominibus causa existit. Nam & deformitatem & miseram vitam hominibus inducunt; multos verò etiam vitâ privant. Et deformitatem quidem propter caloris totius vitiationem ex evacuatione succedentem; miseram verò vitam propter corporis debilitatem, ex fl. vitalis defectu.* *Quandòq; autem de vitâ periclitantur sic affecti, cum ob excedentem evacuationem perfrigeratum Hepar aquam intercutem operatur, vel phthisis subsequatur.* Quæ ramen omnia intelligenda sunt, si affluxus modum excedat. Et ut omnia paucis complectamur; si aperiantur hæmorrhoides, quando sanguis in corpore vitiosus, & forsitan etiam copiosus adest, utiles sunt, & corpus sanum conservant. Contrarium si fiat, contrarium etiam accidit; similiter si cum morbus adest vel imminet, aperiantur, sanitatem promittunt, si verò tum occludantur morbum certò ingruere, vel præsentem auctum iri, denunciant.

XXXIII. In genere autem omnes hæmorrhoides peccantes sunt curatu difficiliores; tùm quia pars illa est via quâ corporis excrementa educuntur, tùm quia nervosa est, & multi sensus particeps: tùm quia continua fecum dejectio medicamentorum vires impedit.

XXXIV. In hæmorrhoidibus valde dolentibus, nisi maturè succuratur, metuendum est ne inflammatio & apostema, vel ulcus vel fistula, vel aliquod aliud grave malum excitetur. Cœcæ item hæmorrhoides internæ si versus virgam tendunt, periculosæ sunt quia inflammatae plerumq; urinæ viam constringunt & stranguriam excitant. Cœcæ hæmorrhoides, nisi maximè tument & magnum dolorem inferant, potius naturæ committere quàm aperire præstat. Insignes & majores sanguinis effusiones fiunt ab hæmorrhoidibus à V.C. ortis, quia majores & plures sunt, & propterea etiam majori cum periculo accidunt. Ad salutem terminantur apertæ, fluxum vel arte cohibente, vel naturâ sanguinem per alias vias ejiciente, utpote per hæmorrhagiam narium, vomitum (*ut ex Amato Lusiano constat*) mictionem cruentam, quam aliquoties observavit Rolfinck. & nuper etiam magnæ authoritatis Vir, *Spectatiss.* DN. DECANUS, Patronus noster nunquam sine honoris encomio nominandus. Suppressæ autem seu cœcæ vel vaforum apertione salutarimodicoq; effluxu, autetiam aliquando omnimodâ exsiccatione. Dolentes diutius interiores visæ tandem sunt salutariter terminari per purulentam sponte excretam materiam, ulcereq; exsiccato, quæ observatio est Rolfinckii. In alios morbos deteriores quandòque, qui tandem ad ipsam quoque mortem deduxere, migrant hæmorrhoides. Hinc modò infimi ventris incolæ & accolæ, modò thoracis aborigines, modò arx humanæ rationis & caput variè pessundantur, & complicatis afficiuntur affectibus, præcipuè verò ex humorum palindromiâ suppressis scilicet hæmorrhoidibus, ad varias partes redundantium. Ita ex hæmorrhoidesuppuratâ fistulas fieri scribit, *Paræus*. Diutius suppressas & ab ægrotis negle-

Et hæmorrhoides in abscessum scroti periculosum, in aliis in abscessum partium vicinarum (quibus curatis fistulæ remanserint) abeuntes vidit *Mæbius*.

XXXV. Adductis hæcenus iis, quæ ad cognitionem affectus proposita necessaria visa fuere, progredimur nunc ad Curationem. Symptoma autem ut symptoma non indicare curationem universus ferme Medicorum dictat Senatus, cum ea spontè cessent si morbus ritè fuerit curatus. Ex accidenti autem symptomata curationem ad se trahere concedit ipsemet *Galenus* 12. *Meth. med.* 1. quando scilicet causæ naturam habent & urgent. Dicuntur autem *symptomata urgentia*, quæ flammæ vitali interitum minantur, adeoque mitigationem, sive præsens auxilium vellevationem ægri ab accessione postulant, cujusmodi aucta morborum magnitudini succedere, & causarum vehementiam emulari solent, quemadmodum accuratè illa descripsit sæpius laudatus & nunquam satis laudandus *Speculatissimus* DN. DECANUS in *Meth.* 3. *Prud. Med.* annexâ. Ad hæc autem urgentia symptomata nimium quoque hæmorrhoidum profluvium, earundemque suppressionem referendam esse, nullum planè est dubium, ut ita meritò de curatione prospiciendum sit, cum occasio præceps sit. 1. *aph.* 1. Accedit, quod hoc loco sub nomine symptomatis ipse quoque morbus, solutio continui vasorum tacitè comprehendatur, cujus curatio monstranda omninò nobis nunc erit. Ad hanc ritè & dogmaticè instituendam proponendæ sunt indicationes & remedium materiae. Nam indicationum inquit *Linden. exercit.* 11 X. §. 63. sanè officium est monstrare juvans. Juvans vero id dicitur de quo auxiliamur Naturæ, atq. complectitur non solum materiam remedii, sed & rectum usum. Indicationes autem in hoc nostro affectu universaliores & principales sunt, quæ à morbo & à causis morbificis desumuntur, nimirum unitio solutæ vasorum unitatis, & sanguinis immodicè profluentis cohibitio, quò scilicet servetur illud quod retinendum est, & præter naturaliter evacuetur; suppressi verò provocatio, vel ad alium locum revulsio; tandem dolo-

doloris mitigatio. Pro quarum feliciore affecutione subordi-
nantur particulae res aliae, nimirum copiosioris sanguinis proven-
tus impeditio, acrimoniae sive ichorescentiae correctio, ebullitio-
nis nimiae tranquillatio, caliditatis excedentis refrigeratio, frigi-
ditatis sive defectus flammæ vitalis caloris inductio, & ejus resti-
tutio, sanguinis viscidioris crudi attenuatio, maturatio, tandem
fibrositatis restitutio. Quas si per dextrum remediorum usum
Medicus obtinuerit, non habet quod dubitet, de virium vita-
lium restitutione, deq; curatione ritè peractâ.

XXXVI. Auxilia ad dictas indicationes obtinendas necessaria
peti possunt ex tripartito rerum non naturalium penario vel fon-
te, *Chirurgico, Pharmaceutico & Dietetico.* *Chirurgia* offert
Præsidium maximum; *Vena-sectionem* scilicet revulsione gratiâ in
brachiis instituendam, nimirum si à plethorâ morbus fuerit obor-
tus, & vires nondum penitus prostratae. Hanc licet largam com-
mendaverint nonnulli; suspecta tamen meritò habenda, cum
præsupponatur, jam ante factum fuisse profluvium non sine flam-
mæ vitalis detrimento, & virium prostratione, præsertim cum
penu sanguinis confertim diminuto quatenus scilicet sanguifica-
tio labascit, hydrop tandem aut cachexia sequatur; præstabit ita
sanguinis missionem partiri, & eam aliquoties repetere; neque
ad vires præsentis saltem, sed etiam futuras respiciendum est. *Cu-
curbitula* deficientibus viribus substitui queunt, affigendæ fre-
quentius scapulis, lumbis, hypochondriis dextri vel sinistri late-
ris, ut & mammis, cum vel sine scarificatione, ut recursus fiat:
his non sufficientibus ferrum candens adhibendum, ita ut nec
tangat cutem, nec comburat, sed actuali tantum virtute aduetur
Friktiones item & *ligatura* pro revulsione quoque hûc faciunt,
partium præcipuè superiorum. *Fontanellas* in cœcis & apertis
apprimè convenire pluribus demonstrat *Zacut. Lusitan.* Et non
absq; ratione. Nam ubicunque pro materiâ peccante tum è
sanguine, tum è succo nervoso emissarium aperitur, illuc plures
particulæ heterogeneæ ac morbificæ unâ effluunt, propterea ut
visce-

viscera salva persistent; nam quæ sanguinis vitiosi recrementa foras continuò derivant & paulatim excernunt, ferè nulli non commodo esse solent.

XXXVII. *Pharmacia* varia quidem offert medicamenta ad curationem hujus affectus proficua, sed delectum magno opus habent. Commendat quidam practici *purgationem & vomitum*. Verùm utrumq; remedium præsentem jam nimio fluxu nobis meritò habetur periculosum & suspectum ob vim purgantium & vomitoriorum humores & sanguinem exagitantium, resolventium, & magis fundentium, coctionem naturalem h. e. fermentationem, sanguinis & spirituum elaborationem, activitatemq; infringentium. Præservationis verò gratia tempestivè adhibita & cum moderatione, utilitate non carebunt, pro tollendâ scilicet sanguinis biliositate & serositate superfluâ. Hic in usum vocari possunt seqq. v. g. *syrup. rosar. solutiv. aut violar. manna, Rhabarbar. fol. Senæ, Syrup. de cichor. cum Rhabarbar. diapersicor. &c.*

XXXVIII. Magis ad rem facient interna adstringentia incrasfiantia, præcipitantia, temperatè refrigerantia. Inter quæ præ cæteris excellunt, quæ cum adstrictoriâ vi & præcipitante *diaphoresin* juvant, ut *bolus armena orientalis præp. terr. Sigillat. & Lemnia, CC. ustum. & Philosophic. calcin. Corall. rubr. cum vehiculis adstringentibus oblata, ocul. cancri succin. alb. præpar. croc. mart. adstring. &c.*

XXXIX. Specificorum & propriâ vi sistentium sanguinem tantus ubiq; numerus, ut numerare volentem numerus deficiat. Nos saltem potiora & usitiora adducemus, atq; in sanguinis profluviiis aliis utilia, quæ sequentia esse possunt: *Alchimall. bellides, burs. Pastoris, equiset. hypericon, millefolium, polygon. plantag. portulac. sanicul. tormentill. bistort. veronic. virg. aurea decoctum it. plantag. cichor. flor. hypericon. cum syrup. granat. cydonior. acetos.* Specificè verò commendantur ad hunc fluxum compescendum ex *vegetabilium* regno *verbascum*, quam plantam appropriatam huic fluxui esse dicunt *Platerus & Riverius*; radix item *chelidon. min. & scro-*

scrophularia, fructus immatur. ligni guajac. experimento Aquapend.
Ex Animalium numero laudantur anguilla pinguedo, sanguis hu-
manus, vel etiam aliorum animalium, pulmo Arietis, pili leporini,
tela araneorum, pulv. bufonis terrestr. *Ex mineralium gazophylacio,*
& Chymicorum penu prodit Mars, ejusq; essentia, & Crocus, tinctu-
ra item adstringens in minimâ dosi exhibita vires maximas exse-
rens. &c.

XL. Urgente autem nimis fluxu cruento, exhibenda sunt illa, quæ sanguinem increassant magis & quasi inspissant, qualia sunt *opiata narcotica, syrup. de papav. theriac. rec. laudan. opiatum, pilul. de cynogloss.* cum adstringentibus & sudoriferis. Ast quia hæmorrhoides non modò à futuris morbis tueri, sed & à præsentibus jamjam infestantibus liberare queant, diligenter propterea Medico cavendum erit, ne temerè eas supprimat. Quod si contra *aph. 12. sect. 6.* fecerit, multorum certè, & eorum sanè non levium morborum, quibus ille, cui intempestivè & nullâ urgente necessitate suppressit, corripietur, author erit.

XLI. *Topica* non minus utiliter hîc adhibentur, imò omne absolvent punctum ex multorum sententiâ, dum plus hoc in casu præstare dicuntur, quàm adstringentia intus sumta: sic *fomentum ex decocto verbasc. in ∇ ferrar. vel vino adstringent.* paratum *Riverius* existimat fore utilissimum. *Unguentum Comitiss.* valdè etiam laudatur, si scil. illo dorsum & hæmorrhoides inungantur. Sic nonnulli etiam commendant *oleum myrtin. mastich. rosar.* Nobis tamen videntur suspecta linimenta ex oleis & unguentis parata, in quantum scilicet ea fibrarum tonos, si altiùs penetrarint, magis laxant, proindè ut materiæ morbificæ incursibus facilè pateat; cutis insuper poros inferciunt, quò minus effluvia evaporent. *Emplastr.* fiat stipticum ex *unguento Comitiss.* cum *cerâ bolo armen. aloë, thur. & malicor.* *Suppositoria* item in usum vocanda ex *bolo armenâ, sanguine Dracon. vitriol. cum syrup. de ros. sicc. Injections ex vino stiptico & aq. fabril. cum radic. bistort. tormentill. cortic. guajac. saccul. ex ros. rubr. & pulv. malicor. &c.* *Thermas* commendat *Aëtius* alumi-

nosas. *Viscerum* tandem *robori* prospiciendum : *hepatis* nempè & *lienis*, si calidiora fuerint, non solum intemperies refrigerantibus corrigenda, sed & illis robur adflandum. *Cordi* prætereà maximè in tanto ardore sanguinis succurrendum. Idcirco in hoc casu remedia Cardiacæ frigida & attemperantia, quæ sanguinis fervorem restinguunt & sedant, simulq; spiritus animales, quò magis ardua tunc vitæ pensa præstare possint, blandè refo-cillant, adhibere oportet: in quorum fines adhibendæ *aq. borra-gin. meliss. flor. paralyf. &c.* nec non *syrup. & conserva.*

XLII. *Diatam* ad morborum è corpore humano ejectionem & propulsionem, sanitatisq; & vitæ conservationem & propaga-tionem maximum esse fundamentum, ipse *Galenus* Venerabilis Artis Medicæ arcanorum Mystagogus *lib. de tuend. Sanit.* confir-mat. *Rarius*, inquiens, *agrotabunt congruo utentes regimine, & quæ oportet, facientes.* Hoc sicuti verissimum, ita & in hoc nostro af-fectu maximum locum obtinet, utpote cui plerumq; sola sufficit exacta & exquisita Diætæ ratio & correctio. *Aër* itaq; sit paulu-lum temperatior, ad frigiditatem & siccitatem vergens. *Alimen-ta* quantitate non excedant, ne flammam multam augeant, vim habeant incrassandi viscidam; ut *amylum, oryza, ptisana hordei, ova sorbilia, juscula consummata*, non tamen sint coctu difficilia. Pro potu *vinum rubrum* aliquando concedatur. *Quieti* indul-gendum & *somno* paulò longiori. *A rebus Venereis* abstinendum. *Sudoris & fuliginum* exclusio promovenda. Omnes *affectus ani-mi* vehementiores studiosè vitandi; ut & cætera supra inter cau-sas procatarcticas recensita, cautè declinanda, ne porrò ansa de-rus concitatori sanguinis ebullitioni. Et hæc de Apertarum cu-ratione sufficiant.

XLIII. *Cæcarum tumentium atq; suppressarum hæmorrhoidum cu-ratio* contrariam planè medendi rationem postulat, cùm indica-tiones hîc prioribus planè contrariæ sint, viæ namq; aperiendæ veniunt, sanguis crassior attemperandus, interdum aliò revel-lendus aut derivandus, nonnunquam hæmorrhoides prorsus ex-ficcant-

siccandæ. Remotio autem ut facilior & felicior ex toto & loco affecto habeatur, dum sanguis ejusmodi inconveniens perpetuò affluit, & affluendo præsentiam auget humoris peccantis, causa propterea sive humoris peccantis portio non tam præsens, sed & secutura sive futura respicienda est. Et hæc per proventus ejus prohibitionem præcavenda, illa verò per evacuationem removenda. Cum autem jam præsens sive fluxa tolli nequeat ante remotionem fluentis; neq; fluens removeri possit ante remotionem fluxuræ; rectè igitur juxta *Method. Spectatiss.* DN. DECANI, *morb. curand.* II. à fluxuræ portione ceu abundante curationem ordimur, & quidem per præsidia universalialia, v. g. per *V. Sectionem* revulsionis gratiâ primò in brachio; dein derivationis ergò in talo institutam; tum ut felicior vasorum acceleretur depletio, tum ut liberior reliquæ massæ sanguineæ subsistenti restauretur agitatio, tum deniq; ut vegetior medicamenti lentorem sanguinis corrigentibus concilietur maturatio. *An autem hæmorrhoidum tumentium sectio & ustio tuta sit?* cum sæpius immedicabiles subsequantur hæmorrhagiæ & fistulæ, non abs re hîc quæritur. *Aquapend.* in negativam inclinat sententiam, dicens, se per experientiam non potuisse unquam hæc probare, neq; à plerisq; tolerari aut sustineri, cum pars hæc, si quæ alia exquisitissimo sensu sit prædita. Ideòq; mavult hæmorrhoides tumentes medicamentis, quàm Chirurgiâ curari. *Hirudinum* interea usus non negligendus, quarum impositionem omnibus aliis plurimi ceu specificum hæmorrhoidum præsidium, præferunt. Et licet *Trincavell. de rat. cur. part. corp. human. p. n. aff. lib. 9. c. 14.* apertionem hæmorrhoidum per hirudines dissuadeat, quod venenatæ sanguisugæ istæ videantur, & cum eo alii. Illorum tamen rationes eruditè retundit *Senn. cit. loc.* Nam ante applicationem præparandæ sunt aspersione aq. falsæ, ne morsu violento aut maligno violentiam inducant, sive consolidationem vulneris impedian, sive gangrænam accersant, in his præcipuè locis, ubi corporis quasi sentina habetur. Sedes sive locus spongiâ ▽. dulci sive melleâ, sive sac-

charatâ muniendus , ut eò citiusaperiri possint. Porro non auferantur hirudines donec plenæ cruoris fuerint. Ut autem cute decidant, sale sunt aspergendæ. Affiguntur sive binæ sive plures, pro sanguinis evacuandi multitudine & necessitate. Quoad tempus, hæmorrhoidum apertio quovis tempore tentanda, quando Natura non succumbit, imprimis autem quandò hæmorrhoidalis fluxus aliàs consuetus jam inhibetur, vel novas prorsus affectat vias, vel aliorum morborum causa existit. Tunc exterius anus illinenda *butyro cum spiritu vini*, vel *felle tauri*; *foment. ex decocto lamii fœtid. cum vino*, it. *artemis. rubr. vulgar. suppositoria* intrudenda ex *mell. cum aloë* parat. it. exhibendæ *pilule de aloë rosat.* vel etiam pilulæ JESU dictæ; item lintheum applicandum cum albumine ovi, donec exsiccetur, exsiccatum cum impetu detrahendū.

XLIV. Fluxurâ portione imminutâ *fluentem* aggredimur præfidiis aliorum revocantibus, ac derivantibus, ut *cucurbitulus*, pro diverso scopo modò coxis, modò hypochondriis applicatis. Dein *fonticulis*, hujus evacuationis defectum non sine emolumento supplantibus, maximè autem in fœminis, si menstrua fuerint suppressa. Deniq; *frictionibus partium*, quæ fieri possunt panno aspero calido, folio ficus, aut parietariæ, aut similibus.

XLV. *Humoribus* interea *impuris*, qui sæpius hujus suppressionis causæ sunt, præmissâ primarum viarum leni ac iteratâ, usu scilicet *prunor. cum mann.* herbarum item emollientium in jure pingui decoctarum, ut *malv. lactuc. borragin. betha, brassicâ* purgatione, subveniendum medicamentis calidis scilicet attenuantibus, incidentibus, uno verbo spirituaſcentiam sanguinis reparantibus, & quidem interiorius *Cochlear. nasturt. aquat. Card. B. fumar. sambuc. calament. helen. pimpinell. aristol. rotund. vera, bethonic. &c.* *Viscerum obstructionibus* consulemus interiorius vel decocto aliquo radicum aperientium, vel vino medicat. *aristol. rotund. ver.* non omillis *cichoraceis*, lacteâ suâ amaritudine sanguini tenuitatem & quasi friabilitatem largientibus, aliisque appropriatis. *Exterius* ex iisdem aut aliis convenientibus, fomenta, lotus balnea, in usum

sum vocari possunt. Fluxilic reddito corpore per intervalla removemus impuritates, v. g. *rhabarb. specieb. diaturbith. cum Rhabarb.* quibus admisceri debent, quæ oscula venarum aperiunt, qualia sunt *aloë violata, rosata; pilul. Aleophang. Franckofurtens. Species Hieræ picra, pilul. sine quibus &c.* ut factâ per purgantia humorum fermentatione, portionum heterogenearum sequestratione, & sequestratarum eliminatione, saburra humorum à visceribus subducatur, minera mali extirpetur, infirmitas corroboretur, fomes residuus, aut recidivæ metus eradicetur, & massa sanguinea homogeneitate, ac motus donetur æqualitate.

XLVI. *Fluxam* deniq; tollimus *topicis* poros relaxando digerendoq; materiam evocantibus doloremq; demulcentibus. Inter simplicia ex *vegetabilibus* commendatur *succus cæparum*, qui *aloë mistus*, & panno asperiori fricando applicatus hæmorrhoides aperit. Ab aliis laudatur *cyclamen, anagallis mas, Centaur. min. rad. ireos, scrophular.* quæ ceu appropriata hæmorrhoidibus, easdem movere & sistere dicitur; *galeopsis* item sive *urtica mortua*, cujus solo succo pro specifico utuntur. Ex *animalibus* commendatur *fel porci, bovis, stercus columbinum cancri fluviatiles ol. olivarum*, ad mellis consistentiam cocti. Ex *mineralibus* *alumen* loco suppositorii usurpatum solum sæpius fluxum concitasse affirmat *Petræus. &c.* Unguentum tale commendat *Weckerus.*

℞ Ol. matricar. ℥s.
lardi ℥j.
sterc. columb. ℥iij.
salis ℥ij.

M. & F. unguentum.

Job. Crato, trium Imperatorum Medicus sequenti usus est remedio: Cæpa excavetur, impleatur Ol. amygdalarum amararum, tegaturq; rursus suo operculo, sub cineribus assetur, succus exprimatur, anoq; illinatur. *Paræus* bulbos sub cinere coctos cum *theriac.* & oleo rutæ vel rosarum ad formam unguenti redigit.

Emplastra fiant ex farinâ lupinorum, felle bovis, stercore columbin. In topicorum hujusmodi applicatione notandum tamen, si cum tumore dolor simul adsit vehemens, semper aliquid opii similiumve anodynorum adjiciendum esse. *Suppositiorum* forma tumentibus hæmorrhoidibus admodum quoq; conveniens videtur, nisi nimium intumuerint, aut *retineri* nequeant. *Injectiones* quoque & *clysteres* fieri queunt ex decocto herbarum emollientium & incidentium. *Inseffus* & *balnea* tam naturalia, quam artificialia conducunt, si iis opus esse videatur. *Aqua pendens* nempe ait tumentes se curare inseffione in aq. thermalibus: spongiam quoq; iis immerfam atq; expressam ano applicat.

XLVII. Si verò nunquam fluxerint hæmorrhoides, neque spes est, eas esse fluxuras, nihilominus tumeant & ob id doleant, exsiccatio earundem suscipienda per digerentia & siccantia interna vel externa. Interius eum in scopum assumuntur decoctum ononidis, verbasci pulvis cum lacte aliove liquore; pulvis item millefolii, vel tormentill. pilul. de bdellio frequenter usurpatas easdem insensibiliter distrahere testatur *Riverius*. Exterius adhiberi queunt fots, inseffus, unguenta, cataplasmata, facta ex acaciâ, bolo armen. linguo guajac. alumin. verbasco. &c. Si æger super asserem ex ligno pini plano factum, & pinguedine aliquâ, vel Ol. inunctum sedeat, hæmorrhoides eo exsiccari quidam statuunt. Si verò non in totum supprimantur hæmorrhoides, sed saltem imperfectè fluant, eadem proficua sunt auxilia, nisi quod exterius in usum vocata leniora esse debeant, facto scilicet inseffu ex decocto dictarum plantarum, vel vapore ex iisdem suscepto; vinum generosum & aloëtica exhibeantur.

XLVIII. Restat ut de frequentissimo hæmorrhoidum symptomate, quod tumentibus præprimis & cœcis accidere solet, *dolore* nimirum paucis agamus. Tanta namq; est interdum ejus vehementia, ut curationem ad se rapiat. Eò, propterea juxta *method. Excellentiss.* DN. D. HOFFMANNI, morborum curandor. III. summè elaborandum, ut flammæ vitalis continuatio juvetur,

vetur, antequam animus deficiat, per remotionem eorum, quæ vehementer peccant, & conservationem eorum, quæ confertim evacuantur. Quia itaq; dolor sæpius urget, animum cum corpore affligens, Medicum eâ de causâ animosum à rectâ curationis distrahit viâ.

XLIX. *Dolorem*, sive molestant sensationem à continui solutione dependentem, & curationem ad se rapientem, aliàs per se nihil indicantem, compescemus medicamentis tum topicis externis, tum internis acrimoniam sanguinis mitigantibus, fervorem extinguentibus, humorumque impetum tranquillantes. Sunt leniora *malv. fœnumgræc. althæa, melilot. sem. lini. &c. fursures* sacculo inclusi cum lacte cocti locoq; dolenti applicati. In *scrophulariâ* peculiarem vim ad hosce dolores compescendos expertus est *Henricus ab Heer*, si nimirum quidem *scrophulariâ* vel radic. vel foliorum cum cibo & potu sumantur. *Scarabæos* commendat *Crollius*. *Millepedes* sive *aselli* in ol. nucum cocti, sedique inuncti in secretis fuere *Quercetano*. Ex compositis laudantur *aq. tussilag. sambuc. solan. scrophular. ol. rosar. viol. flor. sambuc. buxi*, quod mirificè extollit *Riverius*. Sicut ol. nucum *Quercetanus*. &c. Nobis communicavit *Speculatissimus DN. DECANUS* seq. ut : *R. Lap. calam. pulveris. Ung. ros. ol. viol. āā. ʒij. M.* Commendatur item *unguentum rosatum*, *pomat. de cynogloss. ad hæmorrhoid. Augustanor.* In quorum pinguium applicatione illud observandum, ne sine discrimine loco dolenti, adhibeantur, parùm pensitatâ causâ doloris; Verùm ex consilio *Aquapend.* locus si nimium doleat, prius inspiciendus, sitne semel gangrænâ correptus? velut sæpius contigit. *Fomenta & fotus* fiant ex *fol. & flor. verbasci alii iusq.* Quidam bonum *Henricum* cum butyro & lactis cremore lento igne coquunt, expressumq; succum, cum insigni levamine adhibent. Externè valet etiam *linaria* cum lacte cocta, & imposita, vel ejus *unguentum*, vel oleum. Item *ol. ex milleped.* quod singulari pro arcano habuit principissâ quædam in Italiâ; & *P. Borellus* communicat. *Ulysses Aldrovandus* magni facit her-

herbam inde hæmorrhoidalem dictam, quæ species esse censetur polygoni, eâq; tactâ hæmorrhoides dolentes melius habere dicit; imò si circa femur per diem gestata fumo suspendatur, hæmorrhoides simul cum herbâ scribunt corrugari, omnemq; dolorem evanescere.

L. Quod si hisce omnibus minimè obtemperet dolor, adeò ut metus instet, lapsus virium insignis, in usum trahendum est, (non nisi tamen extremâ urgente necessitate,) *laudanum opiatum*. Quibus peractis si vires nimium debilitatas videmus, earum restitutioni simul consulendum, remedia ea propter hoc in casu danda particulis sulphureis & spirituosis prædita, quæ nempe sanguinem cumque eodem simul spiritus vitales & Animales ex suscitant & confortant; ut sunt *vina generosa, aq. ardent.* aut mitiores cum aromat. &c.

LI. *Symptomatum* simul reliquorum concurrentium, verbi gratiâ, *inflammationis, condylomatum, exulcerationis, gangrænæ &c.* curatio ex propriis locis petenda.

LII. *Diata* tandem medicamentis respondeat. *Aer* propterea non nihil ad caliditatem vergat, pro motu sanguini communicando. *Cibi* sint acres, piperati, aromatibusq; conditi. *Motus & exercitium corporis* instituat. *Affectus animi* sint moderati. *Alvus* quotidie voto respondeat.

Atq; hic finis esto: pro temporis brevissimi, quod in hujusce materiæ elaborationem impendere potuimus, ratione. Interim Divino Numini pro viribus, quas ad disputationis hujus Inaugularis qualem qualem elaborationem concessit, laus, honor, & gloria dicta sint in secula.

F I N I S.